

## 增廣賢文

《增廣資文》又名《昔時賢文》、《古今賢文》。書名最早見之于明代萬曆年間的戲曲《牡丹亭》，據此可推知此書最遲寫成于萬曆年間。後來，經過明、清兩代文人的不斷增補，才改成現在這個模樣，稱《增廣昔時賢文》，通稱《增廣賢文》。作者一直未見任何書載，只知道清代同治年間儒生周希陶曾進行過重訂，很可能是民間創作的結晶。

《增廣賢文》以有韻的諺語和文獻佳句選編而成，其內容十分廣泛，從禮儀道德。典章制度到風物典故、天文地理，幾乎無所不含，但中心是講人生哲學、處世之道。其中一些諺語、俗語反映了中華民族千百年來形成的勤勞樸實、吃苦耐勞的優良傳統，成為寶貴的精神財富，如“一年之計在於春，一日之計在於寅”，“一飯一粥，當思來之不易，半絲半縷，恒念物力維艱”等；許多關於社會、人生方面的內容，經過人世滄桑的千錘百煉，成為警世喻人的格言，如“良藥苦口利於病，忠言逆耳利於行”，“善有善報，惡有惡

報”，“樂不可極，樂極生悲’等；一些諺語、俗語總結了千百年來人們同自然鬥爭的經驗，成為簡明生動哲理式的科學知識，如“近水知魚性，近山知鳥音”，“近水樓臺先得月，向陽花木早逢春”等。

昔時賢文，誨汝諄諄，集韻增廣，多見多聞。

觀今宜鑒古，無古不成今。

知己知彼，將心比心。

酒逢知己飲，詩向會人吟。

相識滿天下，知心能幾人。

相逢好似初相識，到底終無怨恨心。

近水知魚性，近山識鳥音。

易漲易退山溪水，易反易覆小人心。

運去金成鐵，時來鐵似金，讀書須用意，一字值千金。

逢人且說三分話，未可全拋一片心。

有意栽花花不發，無心插柳柳成陰。

畫虎畫皮難畫骨，知人知面不知心。

錢財如糞土，仁義值千金。

流水下灘非有意，白雲出岫本無心。

當時若不登高望，誰信東流海洋深。

路遙知馬力，事久見人心。

兩人一般心，無錢堪買金，一人一般心，無錢堪買針。

相見易得好，久住難爲人。

馬行無力皆因瘦，人不風流只爲貧。

饒人不是癡漢，癡漢便不饒人。

是親不是親，非親卻是親。

美不美，鄉中水，親不親，故鄉人。

鶯花猶怕春光老，豈可教人枉度春。

相逢不飲空歸去，洞口桃花也笑人。

紅粉佳人休便老，風流才子莫教貧。

在家不會迎賓客，出外方知少主人。

黃金無假，阿魏無真。

客來主不顧，應恐是癡人。

貧居鬧市無人識，富在深山有遠親。

誰人背後無人說，哪個人前不說人。

有錢道真語，無錢語不真。

不信但看筵中酒，杯杯先勸有錢人。

鬧裏有錢，靜處安身。

來如風雨，去似微塵。

長江後浪推前浪，世上新人換舊人。

近水樓台先得月，向陽花木早逢春。

古人不見今時月，今月曾經照古人。

先到為君，後到為臣。

莫道君行早，更有早行人。

莫信直中直，須防仁不仁。

山中有直樹，世上無直人。

自恨枝無葉，莫怨太陽偏。

萬般都是命，半點不由人。

一年之計在於春，一日之計在於寅，一家之計在於和，一生之計在於勤。

責人之心責己，恕己之心恕人。

守口如瓶，防意如城。

甯可人負我，切莫我負人。

積善成名，積惡滅身。

再三行善事，第一莫欺心。

虎生猶可近，人熟不堪親。

來說是非者，便是是非人。

遠水難救近火，遠親不如近鄰。

有茶有酒多兄弟，急難何曾見一人。

人情似紙張張薄，世事如棋局局新。

山中也有千年樹，世上難逢百歲人。

力微休負重，言輕莫勸人。

無錢休入衆，遭難莫尋親。

平生莫作皺眉事，世上應無切齒人。

士者國之寶，儒爲席上珍。

若要斷酒法，醒眼看醉人。

求人須求大丈夫，濟人須濟急時無。

渴時一滴如甘露，醉後添杯不如無。

久住令人賤，頻來親也疏。

酒中不語真君子，財上分明大丈夫。

出家如初，成佛有餘。

積黃金白銀千兩，不如明解經書一卷。

養子不教如養驢，養女不教如養豬。

有田不耕倉廩虛，有書不讀子孫愚。

倉廩虛兮歲月乏，子孫愚兮禮義疏。

同君一席話，勝讀十年書。

人不通今古，馬牛如襟裾。

茫茫四海人無數，那個男兒是丈夫。

白酒釀成緣好客，黃金散盡爲收書。

救人一命，勝造七級浮屠。

城門失火，殃及池魚。

庭前生瑞草，好事不如無。

欲求生富貴，須下死工夫。

百年成之不足，一旦敗之有餘。

人心似鐵，官法如爐。

善化不足，惡化有餘。

水太清則無魚，人太緊則無智。

知者減半，愚者全無。

在家由父，出家從夫。

癡人畏婦，賢女敬夫。

是非終日有，不聽自然無。

甯可正而不足，不可邪而有餘。

甯可信其有，不可信其無。

竹籬茅舍風光好，道院僧房總不如。

命裏有時終須有，命裏無時莫強求。

道院迎仙客，書堂隱相儒。

庭栽棲鳳竹，池養化龍魚。

結交須勝己，似我不如無。



但看三五日，相見不如初。

人情似水分高下，世事如雲任卷舒。

會說說都是，不會說無理。

磨刀恨不利，刀利傷人指。

求財恨不多，財多害人己。

知足常足，終身不辱。

知止常止，終身不恥。

有福傷財，無福傷己。

差之毫釐，失之千里。

若登高必自卑，若行遠必自邇。

三思而行，再思可矣。

使口不如自走，求人不如求己。

小時是兄弟，長大各鄉里。

妒財莫妒食，怨生莫怨死。

人見白頭嗔，我見白頭喜。

多少少年亡，不到白頭死。

牆有逢，壁有耳。

好事不出門，惡事傳千里。

賊是小人，智過君子。

君子固窮，小人窮斯濫也。

貧窮自在，富貴多憂。

不以我為德，反以我為仇。

甯向直中取，不可曲中求。

人無遠慮，必有近憂。

知我者為我心憂，不知我者為我何求。

晴天不肯去，直待雨淋頭。

成事莫說，覆水難收。

是非只為多開口，煩惱皆因強出頭。

忍得一時之氣，免得百日之憂。

近來學得烏龜法，得縮頭時且縮頭。

懼法朝朝樂，欺公日日憂。

人生一世，草生一春。

白髮不隨人而去，看來又是白頭翁。

月到十五光明少，人到中年萬事休。

兒孫自有兒孫福，莫把兒孫作馬牛。

人生不滿百，常懷千歲憂。

今朝有酒今朝醉，明日愁來明日憂。

路逢險處難迴避，事到頭來不自由。

藥能醫假病，酒不解真愁。

人貧不語，水平不流。

一家有女百家求，一馬不行百馬憂。

有花方酌酒，無月不登樓。

三杯通大道，一醉解千愁。

深山畢竟藏猛虎，大海終須納細流。

惜花須檢點，愛財莫強求。

大抵選他肌骨好，不擦紅粉也風流。

受恩深處宜先退，得意濃時便可休。

莫待是非來入耳，從前恩愛反爲仇。

留得五湖明月在，不愁無處下金鈎。

休別有魚處，莫戀淺灘頭。

去時終須去，再三留不住。

忍一句，息一怒，饒一著，退一步。

三十不豪，四十不富，五十將近尋死路。

生不認魂，死不認屍。

父母恩深終有別，夫妻義重也分離。

人生似鳥同林宿，大限來時各自飛。

人善被人欺，馬善被人騎。

人無橫財不富，馬無野草不肥。

人惡人怕天不怕，人善人欺天不欺。

善惡到頭終有報，只爭來早與來遲。

黃河尚有澄清日，豈可人無得運時。

得寵思辱，安居慮危。

念念有如臨敵日，心心常似過橋時。

英雄行險道，富貴似花枝。

人情莫道春光好，只怕秋來有冷時。

送君千里，終須一別。

但將冷眼看螃蟹，看你橫行到幾時。

見事莫說，問事不知。

閑事休管，無事早歸。

假袍染就真紅色，也被旁人說是非。

善事可作，惡事莫爲。

許人一物，千金不移。

龍生龍子，虎生豹兒。

龍遊淺水遭蝦戲，虎落平陽被犬欺。

一舉首登龍虎榜，十年身到風凰池。

十年窗下無人問，一舉成名天下知。

酒債尋常到處有，人生七十古來稀。

養兒待老，積穀防饑。

雞豚狗之畜無失其時。

數口之家可以無饑矣。

常將有日思無日，莫把無時思有時。

時來風送騰王閣，運去雷轟薦福碑。

入門休問榮枯事，觀看容顏便得知。

官清書吏瘦，神靈廟祝肥。

息卻雷霆之怒，罷卻虎狼之威。

饒人算之本，輸人算之機。

好言難得，惡語易施。

一言既出，駟馬難追。

道吾好者是吾賊，道吾惡者是吾師。

路逢險處須當避，不是才人莫獻詩。

三人同行，必有我師焉，擇其善者而從之，其不善者而改之。

少壯不努力，老大徒傷悲。

人有善願，天必佑之。

莫飲卯時酒，昏昏醉到酉。

莫罵酉時妻，一夜受孤淒。

種麻得麻，種豆得豆。

天眼恢恢，疏而不漏。

見官莫向前，做客莫在後。

甯添一斗，莫添一口。

螳螂捕蟬，豈知黃雀在後。

不求金玉重重貴，但願兒孫個個賢。

一日夫妻，百世姻緣。

百世修來同船渡，千世修來共枕眠。

殺人一萬，自損三千。

傷人一語，利如刀割。

枯木逢春猶再發，人無兩度再少年。

未晚先投宿，雞鳴早看天。

將相額頭堪走馬，公侯肚裏好撐船。

富人思來年，窮人思眼前。

世上若要人情好，賒去物件莫催討。

死生有命，富貴在天。



擊石原有火，不擊乃無煙。

爲學始知道，不學亦徒然。

莫笑他人老，終須還到老。

但能依本分，終須無煩惱。

君子愛財，取之有道。

貞婦愛色，納之以禮。

善有善報，惡有惡報。

不是不報，日子未到。

人而無信，不知其可也。

一人道好，千人傳實。

凡事要好，須問三老。

若爭小可，便失大道。

年年防饑，夜夜防盜。

學者如禾如稻，不學者如蒿如草。

遇飲酒時須飲酒，得高歌處且高歌。

因風吹火，用力不多。

不因漁父引，怎得見波濤。

無求到處人情好，不飲任他酒價高。

知事少時煩惱少，識人多處是非多。

入山不怕傷人虎，最怕人情兩面刀。

強中更有強中手，惡人須用惡人磨。

會使不在家豪富，風流不用著衣多。

光陰似箭，日月如梭。

天時不如地利，地利不如人和。

黃金未為貴，安樂值錢多。

世上萬般皆下品，思量唯有讀書高。

世間好語佛說盡，天下名山僧佔多。

為善最樂，為惡難逃。

羊有跪乳之恩，鴉有反哺之義。

你急他不急，人閒心不閒。

隱惡揚善，執其兩端。

妻賢夫禍少，子孝父心寬。

既墜釜甑，反顧無益。

翻覆之水，收之實難。

人生知足何時足，人老偷閒且是閒。

但有綠楊堪繫馬，處處有路通長安。

見者易，學者難。

莫認容易得，便作等閒看。

用心計較般般錯，退步思量事事難。

道路各別，養家一般。

從儉入奢易，從奢入儉難。

知音說與知音聽，不是知音莫與彈。

點石化爲金，人心猶未足。

飽了肚，賣了屋。

他人睨睨，不涉你目。

他人碌碌，不涉你足。

誰人不愛子孫賢，誰人不愛千鍾粟。

莫把真心空計較，兒孫自有兒孫福。

與人不和，勸人養鵝。

與人不睦，勸人架屋。

但行好事，莫問前程。

河狹水急，人急計生。

明知山有虎，莫向虎山行。

路不行不到，事不爲不成。

人不勸不善，鍾不打不鳴。

無錢方斷酒，臨老始看經。

點塔七層，不如暗處一燈。

萬事勸人休瞞昧，舉頭三尺有神明。

但存方寸土，留與子孫耕。

滅卻心頭火，提起佛前燈。

惺惺常不足，懵懵作公卿。

衆星朗朗，不如孤月獨明。

兄弟相害，不如自生。

合理可作，小利莫爭。

牡丹花好空入目，棗花雖小結實成。

欺老莫欺少，欺人心不明。

隨分耕鋤收地利，他時飽暖謝蒼天。

得忍且忍，得耐且耐。

不忍不耐，小事成大。

相論逞英雄，家計漸漸退。

賢婦令夫貴，惡婦令夫敗。

一人有慶，兆民咸賴。

人老心未老，人窮志莫窮。

人無千日好，花無百日紅。

殺人可恕，情理難容。

乍富不知新受用，乍貧難改舊家風。

座上客常滿，杯中酒不空。

屋漏更遭連夜雨，行船又遇對頭風。

筍因落籜方成竹，魚爲奔波始化龍。

記得少年騎竹馬，看看又是白頭翁。

禮義生於富足，盜賊出於貧窮。

天上衆星皆拱北，世間無水不朝東。

君子安貧，達人知命。

忠言逆耳利於行，良藥苦口利於病。

順天者存，逆天者亡。

人爲財死，鳥爲食亡。

夫妻相合好，琴瑟與笙簧。

有兒貧不久，無子富不長。

善必壽老，惡必早亡。

爽口食多偏作藥，快心事過恐生殃。

富貴定要安本分，貧窮不必枉思量。

畫水無風空作浪，繡花雖好不聞香。

貪他一斗米，失卻半年糧。

爭他一腳豚，反失一肘羊。

龍歸晚洞雲猶濕，麝過春山草木香。

平生只會量人短，何不回頭把自量。

見善如不及，見惡如探湯。

人貧志短，馬瘦毛長。

自家心裏急，他人未知忙。

貧無達士將金贈，病有高人說藥方。

觸來莫與說，事過心清涼。

秋至滿山多秀色，春來無處不花香。

凡人不可貌相，海水不可斗量。

清清之水，爲土所防。

濟濟之士，爲酒所傷。

蒿草之下，或有蘭香。

茅茨之屋，或有侯王。

無限朱門生餓殍，幾多白屋出卿。

醉後乾坤大，壺中日月長。

萬事皆已定，浮生空白茫。

千里送毫毛，禮輕仁義重。

一人傳虛，百人傳實。



世事明如鏡，前程暗似漆。

人生一世，如駒過隙。

良田萬頃，日食一升。

大廈千間，夜眠八尺。

千經萬典，孝義爲先。

一字入公門，九牛拖不出。

衙門八字開，有理無錢莫進來。

富從升合起，貧因不算來。

家中無才子，官從何處來。

萬事不由人計較，一生都是命安排。

急行慢行，前程只有這些路。

人間私語，天聞若雷。

暗室虧心，神目如電。

一毫之惡，勸人莫作。

一毫之善，與人方便。

欺人是禍，饒人是福。

天眼恢恢，報應甚速。

聖賢言語，神欽鬼伏。

人各有心，心各有見。

口說不如身逢，耳聞不如目見。

養軍千日，用在一朝。

國清才子貴，家富小兒驕。

利刀割體痕易合，惡語傷人恨不消。

公道世間惟白髮，貴人頭上不曾饒。

有錢堪出衆，無衣懶出門。

爲官須作相，及第必爭先。

苗從地發，樹向枝分。

父子和而家不退，兄弟和而家不分。

官有正條，民有和約。

閒時不燒香，急時抱佛腳。

幸生太平無事日，恐逢年老不多時。

國亂思良將，家貧思賢妻。

池塘積水須防旱，田地勤耕足養家。

根深不怕風搖動，樹正無愁月影斜。

奉勸君子，各宜守己。

只此呈示，萬無一失。

大家藝文天地轉載

全集字數：5,048 字